

# 妙法蓮華經綸貫

古吳 益道人智旭述

妙法蓮華經者。諸佛究竟之極談也。原夫釋迦牟尼如來。實成佛道以來。已經不可思議阿僧祇劫。爲度眾生。無有休息。數數示生。數數示滅。未種善根者。令種善根。已種善根者。令其成熟。已經成熟者。令得解脫。所有法味。不出藏通別圓等四種。所有化儀。不出頓漸秘密不定等四種。且據此番八相成道。說法四十九年。畧爲五時。初坐菩提道場。爲大根眾生說大乘法。名第一華嚴時。於化儀爲頓。譬如日出。先照高山。又如從牛出乳。於化法爲圓兼別。圓被界外利根。別被界外鈍根。此則小機絕分。不見不聞。所以不動寂場。而遊鹿苑。爲五比丘等。說四諦法。詮生滅理。及說十二因緣。事六度等。名第二阿含時。於化儀爲漸之始。譬如日照幽谷。又如從乳出酪。於化法爲藏。但被界內鈍根。令其轉凡成聖。次借維摩等諸大士。互相酬唱。彈偏斥小。歎大褒圓。名第三方等時。於化儀爲漸之中。譬如食時。又如從酪出生酥。於化法爲四教並談。對半明滿。藏爲半字教。通別圓爲滿字教。使利根得滿益。鈍根得半益。先成聖者。密得通益。次與四大弟子共轉法輪。會一切法皆摩

妙法蓮華經綸貫

妙法蓮華經綸貫

訶衍。名第四般若時。於化儀爲漸之終。譬如禺中。又如從生酥出熟酥。於化法爲帶通別。正明圓教。使界內機得通教。三乘共般若。益界外機得別圓。不共般若。益先成聖者。密得別益。次乃於靈山會上。開權顯實。開近顯遠。名第五法華時。於化儀爲會漸歸頓。亦名非頓非漸。譬如日輪當午。大地普照。罄無側影。又如從熟酥出醍醐。於化法爲純圓。無有一人不得作佛。出世本懷。於茲始暢。舉凡如來化度眾生之方便。施設教網之宏綱。咸於此經開發顯示。所以獨名爲妙。至於涅槃扶律談常。不過曲爲末世鈍根。重施方便。令同會真實耳。其秘密不定。二種化儀。偏在前之四時。惟法華是顯露。非秘密。是決定非不定也。此經靈山演說。凡有八年。貝葉傳持。積至八里。流入震旦者。凡有三譯。今鳩摩羅什所譯。共七卷。二十八品。自古註家紛紛不一。或簡或繁。莫得真要。惟天台智者大師。初見南嶽慧思大師於光州大蘇山。思授以普賢道場。令修法華三昧。誦經至藥王菩薩本事品。是真精進。是名真法。供養如來。豁然大悟。寂而入定。親見靈山一會。儼然未散。獲一旋陀羅尼。自是以後。照了法華如藏和之。臨萬象。達諸法相。似清風之遊太虛。遂以五重玄義。解釋總題。章安尊者記成玄義十卷。復以四意消釋經文章安尊者記成文句十卷。言五重玄義者。一法喻爲名。二實相爲體。三一乘因果爲宗。四斷疑生信爲用。五無上醍醐爲教。

相也。言四意消文者。一因緣。二約教。三本迹。四觀心也。消文浩博。未暇委悉。今畧出五重玄義。一法喻爲名者。妙法二字謂之法。蓮華二字謂之喻。法者畧而言之。眾生法。佛法。心法也。妙者畧而言之。相待妙。絕待妙也。經云。爲令眾生開示悟入佛之知見。若眾生無佛知見。何所論開。當知佛之知見。蘊在眾生。故眾生法妙也。佛法不出權實。經云。是法甚深。妙難見。難可了。一切眾生類。無能知佛者。卽是歎實智妙。又云。及佛諸餘法。亦無能測者。卽是歎權智妙。惟佛與佛。乃能究盡諸法實相。諸法是卽實之權。實相是卽權之實。故佛法妙也。安樂行品云。修攝其心。觀一切法不動不退。普賢觀云。我心自空。罪福無主。觀心無心。法不住。法淨。名云。觀身實相。觀佛亦然。諸佛解脫。當於眾生心行中求。華嚴云。心佛及眾生。是三無差別。故心法妙也。相待妙者。待半字爲顯。明滿字爲妙。三藏但半字生滅門。不能通滿理。故顯滿字是不生不滅門。能通滿理。故妙。又方等般若。帶方便通滿理。故顯。今經直顯滿理。故妙。絕待妙者。說無分別法。卽邊而中。無非佛法。亡泯清淨。無復有法。可相形比。待誰爲顯。形誰爲妙。無所可待。亦無可絕。不知何名。強言爲絕。妙名不可思議。不因乎顯而名爲妙。若謂獨有法界廣大獨絕者。此則大有所有。何謂爲絕。今法界清淨。不可以待示。不可以絕示。滅待滅絕。故言寂滅。用是兩妙。妙上三法。眾生之法。亦具二妙。

佛法心法。亦具二妙。故稱妙法。又廣釋妙者。有迹門十妙。本門十妙。觀心十妙。迹門十妙者。一境妙。二智妙。三行妙。四位妙。五三法妙。六感應妙。七神通妙。八說法妙。九眷屬妙。十功德利益妙。實相之境。非佛天人所作。本自有之。非適今也。故居最初。迷理故起惑。解理故生智。智爲行本。因於智。目起於行。足目足及境。三法爲乘。乘於是乘。入清涼池。登於諸位。位何所住。住於三法秘密藏中。住是法已寂。而常照。照十界機。機來必應。若赴機垂應。先用身輪。神通駭動。次以口輪。宣示開導。既霑法雨。稟教受道。成法眷屬。拔生死本。開佛知見。得大利益。前五約自行。因果具足。後五約化他。能所具足。經云。惟佛與佛。乃能究盡諸法實相。所謂諸法。如是相。如是性。如是體。如是力。如是作。如是因。如是緣。如是果。如是報。如是本末究竟等。卽境妙也。我所得智慧微妙最第一。以此妙慧求無上道。卽智妙也。本從無數佛。具足行諸道。行此諸道。已道場得成果。佛子行道已。來世得作佛。卽行妙也。天雨四華。表住行向地。開示悟入。亦是位義。乘是寶乘。遊於四方。直至道場。四方是因位。道場是果位。卽位妙也。佛自住大乘。如其所得法。定慧力莊嚴。大乘卽真性軌。定卽資成軌。慧卽觀照軌。是三法妙也。於三七日中。思惟如是事。我以佛眼觀見六道眾生等。卽感應妙也。入定雨華動地放光等。卽神通妙也。其所說法。皆悉到於一切智地。已今當說。最

爲難信難解等。卽說法妙也。但教化菩薩。無聲聞弟子。卽眷屬妙也。現在未來若聞一句。我皆與授阿耨多羅三藐三菩提。須臾聞之。卽得究竟三菩提。不令一人獨得滅度。皆以如來滅度而滅度之。卽功德利益妙也。本門十妙者。一本因妙。二本果妙。三本國土妙。四本感應妙。五本神通妙。六本說法妙。七本眷屬妙。八本涅槃妙。九本壽命妙。十本利益妙。本因妙者。本初發菩提心。行菩薩道所修因也。若十六王子在大通佛時。宏經結緣。皆是中間所作。非本因也。過是塵點劫前所行道者。名本因妙。本果妙者。本初所行圓妙之因。契得究竟常樂我淨。乃是本果。不取寂場舍那成佛爲本果也。但取成佛以來甚大久遠初證之果。名本果妙。本國土妙者。本既成果。必有依國。今既迹在同居。或在三土。中間亦有四土。本佛亦有四土。復居何處。文云。自從是來。我常在此娑婆世界說法教化。按此文者。實非今日迹中娑婆。亦非中間權迹處所。乃是本之娑婆。卽本土妙也。本感應者。既已成果。卽有本時所證二十五王三昧。慈悲誓願。機感相關。能卽寂而照。故言本感應也。本神通者。亦是昔時所得無記化化禪。與本因時諸慈悲合。施化所作神通。駭動可度眾生。故言本神通也。本說法者。卽是往昔初坐道場。始成正覺。初轉法輪。四辯所說之法。名本說法也。本眷屬者。本時說法所被之人。如下方住者。彌勒不識。卽本之眷屬也。本

涅槃者。本時所證斷德涅槃。亦是本時應處同居方便二土。有緣既盡。唱言入滅。卽本涅槃也。本壽命者。既唱入滅。則有長短遠近壽命也。本利益者。本時眷屬所獲諸功德也。觀心十妙者。迹門本門。皆論觀心。迹門觀心。散在諸文。本門觀心者。佛如眾生。如一如無。一如佛。既觀心得此本妙。迹用廣大。不可稱說。我如如佛如。亦當觀心出此大利。亦願我如速如佛如。故文云。聞佛壽無量。深心須臾信。其福過於彼。願我於未來。長壽度眾生。如今日世尊。諸釋中之王道。場師子吼。說法無所畏。我等於未來。一切所尊敬。坐於道場時。說壽亦如是。此卽觀心本妙得六卽利益之相也。次明蓮華者。譬喻妙法也。華有多種。或狂華無果。可喻外道空修梵行。無所克獲。或一華多果。可喻凡夫供養父母。報在梵天。或多華一果。可喻聲聞種種苦行。止得涅槃。或一華一果。可喻緣覺一遠離行。亦得涅槃。或前果後華。可喻須陀洹卻後修道。或前華後果。可喻菩薩先藉緣修。生後真修。此皆屬華。不可以喻妙法。惟此蓮華。華果俱多。可譬因含萬行。果圓萬德。又爲蓮故。華實具足。可喻卽實而權。華開蓮現。可喻卽權而實。華落蓮成。蓮成亦落。可喻非權非實。故以蓮華喻於妙法。又以此華喻迹本兩門。各有三喻。迹門三者。一華生必有於蓮。爲蓮故。華而蓮不可見。此譬爲實施權。意在於實。無能知者。二華開蓮現。而須以華養蓮。譬權中有實。昔無人

知今開權顯實。意須於權廣識。恆涉佛法者。祇爲成實。使深識佛知見耳。三華落蓮成。譬  
廢權立實。唯一佛乘。直至道場。菩薩有行見不了。但如華開。諸佛以不行故見則了。  
譬如華落蓮成也。本門二者。一華必有蓮。譬迹必有本。迹含於本。意雖在本。佛旨難知。彌  
勒不識。二華開蓮現。譬開迹顯本。意在於迹。能令菩薩識佛方便。既識迹已。還識於本。增  
道損生。三華落蓮成。譬廢迹顯本。既識本已。不復迷迹。但於法身修道圓滿上地也。又經  
中凡有七喻。皆喻權實。今以蓮華而總喻之。七喻者。一火宅中三車。一車喻以三車喻權。  
大白牛車。譬實。二信解品中窮子。喻以雇作譬權。村業譬實。三藥草喻以三草二木譬權。  
一地譬實。四化城喻以作化譬權。寶處譬實。五授記品繫珠喻以少有所得譬權。寶珠實  
易譬實。六安樂行品輪王喻以隨功賞賜譬權。解聲明珠譬實。此六皆迹門開權顯實喻  
也。七壽量品中良醫喻以告父死譬權。來歸使見譬實。此即本門開近顯遠喻也。更有  
王饒鑿井二喻。既非全譬一期開顯。所以智者大師畧而不舉。後世輒云九喻。可謂依文  
不依義矣。經者佛所說法之通名也。梵云薩達磨。芬陀利。修多羅。薩達磨。此翻妙法。芬陀  
利。此翻蓮華。具如前釋。此名異於眾典。故稱爲別。一代時教。皆名爲修多羅。故稱爲通。修  
多羅。或翻爲經。或翻爲契。或翻爲法本。或翻爲線。或翻爲善語教。或云無翻。而含五義。一

法本亦云出生。二微發。亦云顯示。三涌泉。四繩墨。五結髮。就此翻五合五。各具教行理三。  
教即世界悉檀。行即爲人對治。二種悉檀。理即第一義悉檀也。又此方聖說。爲經。經者訓  
法。訓常法。以軌持爲義。教可軌。行可軌。理可軌。故名爲法。常者不變爲義。天魔外道不能  
改壞。即教常真正無雜。無能踰過。即行常湛然不動。決無異趣。即理常也。二實相爲體者。  
經云。今佛放光明。助發實相義。又云。諸法實相義。已爲汝等說。又云。惟佛與佛。乃能究盡  
諸法實相。又云。諸佛法久後。要當說真實。又云。我以相嚴身。爲說實相印。又云。開方便門。  
示真實相。又云。觀諸法實相。故知諸佛爲一大事。因緣出現於世。祇令眾生開佛知見。見  
此一實。非因非果之理耳。三一乘因果爲宗者。此經始從序品。訖安樂行品。破廢方便。開  
顯真實佛之知見。亦明弟子實因實果。亦明師門權因權果。文義雖廣。撮其樞要。爲成弟  
子實因實果。因正果傍。故於前段明迹因迹果也。從涌出品。訖勸發品。發迹顯本。廢方便  
之近壽明長遠之實果。亦明弟子實因實果。亦明師門實因實果。而顯師之實果。果正因  
傍。故於後段明本因本果也。四斷疑生信爲用者。迹門用佛菩提。二智斷七種方便最大  
無明。同入圓因。本門破教近迹之情。生於本地深信。乃至等覺。亦令斷疑生信也。五無上  
醍醐爲教相者。五時譬喻。畧如前說。若華嚴初逗圓別之機。高山先照。直明次第不次第

修行地上住上之功德。不辯如來說頓之意。若四阿含通說無常。知苦斷集。證滅修道。不明如來曲巧施小之意。若諸方等折小彈偏。憂圓歎大。慈悲行願。事理殊絕。不明並對詞讀之意。若般若共則三人同人。別則菩薩獨進。廣歷陰入。盡淨虛融。亦不明共別之意。若涅槃在後。畧斥三修。粗點五味。亦不委說如來置教原始要結之終。凡此諸經。皆是逗會他意。令他得益。不譚佛意。意趣何之。今經不爾。舉凡法門綱目。大小觀法。十力無畏。種種規矩。皆所不論。為前經已說故。但論如來布教之元始。中間取與。漸頓適時。大事因緣。究竟終訖。當知此經。惟論設教大綱。不委微細綱目。譬如算者。初下後除。紀定大數。不存斗斛。祇為深論聖教。妙說聖心。近會圓因。遠申本果。所以請疑不已。若能精知教相。則識如來權實二智也。經文二十八品。智者大師分為三分。初品為序。方便品訖。分別功德十九行偈。九十五品。半名正宗。從偈後盡經。凡十一品。半名流通。又一時分為二。從序至安樂行十四品。約迹開權。顯實從涌出。訖經十四品。約本開近。顯遠本迹。各序正流通。初品為序。方便訖。授學無學人記品。為正。法師訖。安樂行為流通。涌出訖。彌勒已問斯事。佛今答之。半品為序。從佛告阿逸多下。訖分別功德品。偈為正。此後盡經為流通。初序有通。有別。通則總冠兩門。別則發起三周正說。後之流通。有勸持。有囑累。勸則別約本門。囑則通屬

全部大經。迹門後五品。但是勸持迹門。本門初序分。但是發起本門。初序品者。次也。由也。迹也。如是等六義證信。冠於經首。次序也。放光六瑞。發起之端。由序也。問答釋疑。正說弄引。敘迹也。故名序品。次方便品以下。凡有三周說法。今方便品。作三乘一乘說。名法說一周。上根得悟。授舍利弗記。次譬喻品。作三車一車說。名譬說一周。中根得悟。授四大弟子記。次化城喻品。明宿世結緣事。竟重作三百由旬。五百由旬說。名因緣說一周。下根得悟。授五百及二千人記。此即迹門開權顯實之正宗也。言方便品者。畧為三解。一曰方者。法也。便者。用也。善用偏法。巧逗眾生。名為方便。此可釋他經。非今品意。二曰方便者。門也。門名能通。通於所通。方便為真實作門。真實得顯功。由方便。此亦可釋他經。非今品意。三曰方者。秘也。便者。妙也。妙達於方。即是真秘。點內衣裏無價之珠。與王頂上惟一珠。無二無別。指客作人是長者子。亦無二無別。如斯之言。是秘是妙。正是今品意也。此品正開三乘之權。顯一乘之實。於中有畧有廣。畧則動執。生疑。廣則斷疑。生信。畧中要旨。不出唯佛與佛。乃能究盡諸法。實相數語。乃一經之宏綱。眾義之淵府。南嶽大師約義三轉讀之一者。是相如是。性如。乃至是報如。如名不異。即空義也。二者。如是相。如是性。乃至如是報。點空相性。名字施設。進邇不同。即假義也。三者。相如是。性如是。乃至報如是。如於中道。實相

之是。即中義也。分別令易解。故明空假中。得意爲言。空即假中。約如明空。一空一切空。點如明相。一假一切假。就是論中。一中一切中。非一二三。而一二三不縱不橫。名爲實相。唯佛與佛。究竟盡此法。是十法攝一切法。智者大師復約四番釋之。一約十界。二約佛界。三約離合。四約位。一約十界者。謂六道四聖也。法雖無量。數不出十一一界中。雖復多派。不出十如。如地獄界。當地自具相性本末。亦具畜生界相性本末。乃至具佛法界相性本末。無有缺減。當知一一界皆有餘九界十如。若照自位九界十如。皆名爲權。照其自位佛界十如。名之爲實。一中具無量。無量中具一。所以名爲不可思議。凡夫雖具絕理情迷。二乘雖具捨離求脫。菩薩雖具照則不周。名不了了。如來洞覽橫豎具足。二約佛法界釋者。佛界非相非不相。而名如是。相指萬善緣。因故下文云。眾寶莊嚴。佛界非性非不性。而名如是。性指智慧了。因故下文云。有大白牛。佛界非體非不體。而名如是。體指實相正。因故下文云。其車高廣。佛界非力非不力。而名如是。力指菩提道心慈善根力等。故下文云。又於其上張設纓蓋。佛界非作非不作。而名如是。作指任運無功用道。故下文云。其疾如風。佛界非因非不因。而名如是。因指四十一位。故下文云。乘是寶乘。遊於四方。佛界非緣非不緣。而名如是。緣指一切助菩提道。故下文云。又多僕從而侍衛之。佛界非果非不果。而名如

是果。指妙覺朗然。圓因所冠。故下文云。直至道場。佛界非報非不報。而名如是。報指大般涅槃。故下文云。得無量無漏清淨之果報。佛界非本非末。而言本末。本即佛相。末即佛報。是自行之權。佛界非等。非不等。而言究竟等。指於實相。是自行之實。即實而權。故言本末。即權而實。故言爲等。三約離合者。若佛心中所觀十界十如。皆無上相。乃至無上果報。惟是一佛法界。如海總萬流。千車共轍。此即自行權實。若隨他意。則有九法界十如相性等。即是化他權實。化他雖復有實。皆束爲權。自行雖復有權。皆爲實。此即自行化他權實。隨他則開。隨自則合。橫豎周照。開合自在。四約位釋如是相者。一切眾生皆有實相。本自有之。乃是如來藏之相貌也。如是性。即是性德智慧第一義空也。如是體。即是中道法性之理也。是爲三德。通十法界位位皆有。若研此三德。入於十信位。則名如是。力如是。作。入四十一位。名如是。因如是。緣。若至佛地。名如是。果如是。報。初三名。本後三名。末。初後同是三德。故言究竟等也。廣開三顯一中。雖徧引十方三世佛。佛道同。總不出於四一。所謂理一人一行一教一理一者。約開示悟入佛之知見。明之復欲四意。一約圓位。二約圓智。三約圓門。四約觀心。一約圓位者。開即十住。初破無明。開如來藏。見實相。理示即十行。惑障既除。知見體顯。體備萬德。法界眾德。顯示分明。悟即十迴向。障除體顯。法界行明。事理融通。

更無二趣。入卽十地。事理既融。自在無礙。自在流注。任運從阿到茶。入薩婆若海。然圓道妙位。一位之中。卽具四十一地功德。祇開卽具。示悟入等。更非異心。但如理知見。無有分別淺深之相。欲顯如量知見。故分別四位耳。二約圓智者。一道慧。見道實性。實性中得開佛知見。二道種慧。知十法界諸道種別。解惑之相。一皆示佛知見。三一切智。知一切法。一相寂滅。寂滅卽悟佛知見。四一切種智。知一切法。一相寂滅。相種種行類相貌皆識。卽入佛知見。又道慧如理名開。道種慧如量名示。一切智理量不二。稱悟一切種智理量雙照爲入。此亦約實理。無淺深中而淺深分別也。三約圓教四門橫釋四句者。空門。一空一切空。卽開佛知見也。有門。一有一切有。卽示佛知見。亦空亦有門。一切亦空亦有。卽悟佛知見。非空非有門。一切非空非有。卽入佛知見。能通則四。所通則一。開示悟入。是能通之門。所知所見。是所通之理也。四約觀心釋者。觀於心性三諦之理。不可思議。此觀明淨爲開。雖不可思議。而能分別空假中心。宛然無濫。名示空假中心。卽三而一。卽一而三名。悟空假中心。非空假中。而齊照空假中。名入。是爲一心三觀。而分開示悟入之殊也。所以四種釋者。見理由位。位立由智。智發由門。門通由觀。觀故則門通。門通故智成。智成故位立。位立故理見。見理故名爲理一也。諸佛如來。但教化菩薩。卽是人一。諸有所作。常爲一事。

妙法蓮華經繪貫

妙法蓮華經繪貫

一四

卽是行一。但以一佛乘。故爲眾生說法。卽一教。此之四一。徧會昔日權理。權人。權行。權教。成今實理。實人。實行。實教。故名開權顯實。妙達於方。卽是真秘也。第三譬喻品者。比況名譬。曉訓名喻。托此比彼。寄淺訓深。前文法說一周。上根獲悟。中下之流。抱迷未遣。大悲不已。巧智無邊。借世間父子。以況出世師弟。借火宅。以喻三界。借三車。一車以喻三乘。一乘。故名譬喻品也。第四信解品者。中根聞譬說一周。信發解生。疑去理明。乃自陳窮子之喻。領上法譬二周之旨也。第五藥草喻品者。土地是能生。雲雨是能潤。草木是所生。所潤。所生。所潤。通皆有用。而藥草用強。喻有漏諸善。悉能除惡。而無漏爲最。無漏。歌中四大弟子。以譬領佛。譬深會聖心。佛故述成。而推廣之。第六授記品者。梵語和伽羅。此云授記。又云受記。受決。受蒞。授是與義。受是得義。記是記事。決是決定。蒞是了蒞。此卽授中根四人成佛記也。第七化城喻品者。無而欲有名。化防非禦敵。稱城。以喻二乘涅槃。乃如來權智所爲也。以權智力。無而說有用。教爲化。防思禦見。名爲涅槃。若藏通二乘。生安隱滅度。想不知是化。通教菩薩入而還出。亦不知是化。別教從城門徑過。不以爲極。亦不說是化。惟圓教知無賊病。亦不須城。故言化城。此正爲下根人。作夙世因緣。說一周也。第八五百弟子受記品。第九授學無學人記品。卽是普與下根授記。作佛迹門。正宗齊此。此下有五品。



流通。法師寶塔兩品。明宏經功深福重。流通未聞。利益巨大。達多一品。引往宏經。彼我兼益。以證功德深重。持品八萬大士。忍力成就者。此土宏經。新得記者。他土宏經。安樂行品。以外凡初心。欣斯勝福。見聲聞畏憚。聞菩薩擯辱。願已力弱。無益自他。便生退沒。佛爲此人。說安樂行。依之宏法。不慮危苦。又法師品。釋尊自說宏經功福。命兌流通。寶塔品。多寶及分身佛。且證且勸。勸竟流通。今第十法師品。法者軌則也。師者訓匠也。法雖可軌。體不自宏。通之在人。五種通經。皆得稱師。舉法成其自行。皆以妙法爲師。師於妙法。自行成就。故言法師。又以妙法訓匠於他。故舉法目師。名爲法師。文中先歎美五種法師能持法人。一受持。二讀誦。三誦。四解說。五書寫。後歎美所持之法。及示通經方軌。所謂入如來室。著如來衣。坐如來座。如來室是大慈悲。若就同體。卽法身也。若被眾生。卽是解脫。能令眾生會於同體。卽是般若。如來衣者。若就所覆。卽法身也。若就能覆嚴身。卽寂滅忍也。若就和光利物。卽解脫也。如來座者。若就能坐。卽般若也。若就所坐。卽法身也。身座冥稱。卽解脫也。雖復各具。祇是一三。三尙非三。豈離爲九。是則菩薩常觀涅槃。故勸宏經者。而常觀之。不觀能宏之心。焉曉所宏之理。故佛令入我室。著我衣。坐我座。若無三法。何謂宏經。第十一見寶塔品者。多寶佛塔。從地湧出。大眾咸見。發大音聲。以證前集佛開塔。以起後也。第十

一提婆達多品者。提婆達多。此云天熱。生時人天生熱。因此立名。迹行逆行。本是佛師。眾生煩惱燒熱。故菩薩示同病行。而度脫之。文中先明昔日達多通經。釋迦成道。次明文殊今日通經。龍女成佛。第十三持品者。有受持。有勸持也。第十四安樂行品者。身無危險。故安心無憂惱。故樂。身安心樂。故能進行。此依事釋也。著如來衣。則法身安。入如來室。故解脫心樂。坐如來座。故般若導行進。此附上品文釋也。住忍辱地。故身安而不卒暴。故心樂。觀諸法實相。故行進。此附本品文釋也。安名不動。六道生死。二聖涅槃。所不能動。樂名無受。不受三昧廣大之用。不受凡夫之五受。乃至圓教中五受。生見亦皆不受。有受則有苦。無受則無苦。無苦無樂。乃名大樂。行名無行。不行凡夫行。不行賢聖行。故言無行而行中道。是故名行。此法門釋也。文中凡有四段。卽是以止觀慈悲導三業及誓願也。身業有止。故離身粗業。有觀。故不得身。不得身業。不得能離。無所得。故不墮。凡夫有慈悲。故勤修身業。廣利一切。不墮二乘地。有止行。故著忍辱衣。有觀行。故坐如來座。有慈悲。故入如來室。止行離過。卽成斷德。觀行無著。卽成智德。慈悲利他。卽成恩德。恩德資成智德。智德能通達斷德。是名身業安樂行。餘口意誓願亦如是。齊此是迹門流通竟也。第十五從地涌出品者。下方空中。法身大士。是釋尊本時弟子。今奉命湧出。宏經。彌勒尙自不識。由此發起



開近顯遠之大教也。第十六如來壽量品。正開近述而顯遠本。如來者十方三世諸佛。二佛三佛本佛述佛之通號也。壽者受也。量者證量也。今正證本地報身功德。而報身智慧。上冥下契。三身宛足。故言如來壽量品。第十七分別功德品者。佛說壽量。三世弟子得種種益。故言功德。淺深不同。故言分別也。品中有授記領解流通。佛說長行為總授法身記。彌勒說偈為總申領解。此後為流通分於中。先明現在四信。次明滅後五品。四信者。一。一念信解。未能演說。二。畧解言趣。三。廣為他說。四。深信觀成。五品者。一。直起隨喜心。二。加自受持讀誦。三。加勸他受持讀誦。四。加兼行六度。五。加正行六度也。第十八隨喜功德品。明初品因功德以勸流通。隨者隨順事理。無二無別。喜是慶己慶人。順理者。聞佛本地深遠深遠信順不逆。無一毫疑滯。順事者。聞佛三世益物。橫豎該巨。徧一切處。亦無一毫疑滯。順理有實功德。順事有權功德。慶己有智慧。慶人有慈悲。權實智斷合而說之。故言隨喜功德品。第十九法師功德品。明初品果功德以勸流通。所謂六根清淨。第二十常不輕菩薩品。引信毀罪。證勸流通。內懷不輕之解。外敬不輕之境。身立不輕之行。口宣不輕之教。人作不輕之目。故名常不輕也。已上三品半文。即勸持流通竟。此下有八品文。明付囑流通。又分為三。神力囑累兩品。正明囑累流通。藥王下五品。約化他勸流通。普賢一品。約

自行勸流通也。第二十一如來神力品者。神名不測。力名幹用。不測則天然之體。幹用則轉變之力。大此中為付囑深法。現十種大力。故名為神力品。第二十二囑累品者。囑是佛所付囑。累是煩爾宣傳。此從聖旨得名。又囑是頂受所囑。累是甘而弗勞。此從菩薩敬順得名。又囑是如來金口所囑。累是菩薩丹心頂荷。此從授受合論是故。如來躬從座起。申手摩頂。授以難得之法。大眾曲躬合掌。如世尊勅。當具奉行。殷勤授受。故名囑累。第二十三藥王菩薩本事品者。勗宏法之師。應當竭其神力。盡其形命。以宏大法也。第二十四妙音品。第二十五觀世音普門品。皆勸受法。逮于令知他方大士。奉命宏經。普現色身。形無定準。不可以牛羊眼看。不可以凡庸識度。於所聞處。勿生輕想。輕想則法不染心也。第二十六陀羅尼品者。惡世宏經。每多惱難。故以咒護之。使道流通。第二十七妙莊嚴王本事品者。說四聖之前緣。顯人護之功德。第二十八普賢菩薩勸發品者。梵音彌輪。顯陀。此翻普賢。亦翻徧吉。伏道徧名。普鄰終際。極名賢勸發者。戀法之辭也。遙在彼國。具聞此經。始末既周。欲令自行化他。永永無已。故自東而來勸發。又總約十一品半流通之文。生起次第者。現在聞經。得真似兩益。如上說。若直聞一句而生隨喜。如現在四信。格其功德。未來無佛。恐人疑福少。故說滅後五品功德也。因功德微密。未若果功德彰灼。故說法師

功德品因果雙舉。未若引證分明。故說不輕。雖舉往人。未若現變。故說神力。雖示神力。未若摩頂付囑。故說囑累。雖通途囑累。未若示具要術。棄身存道。故說藥王。雖誠能化。未若誠其所化。隨聞法處。應生佛想。故說妙音觀音。若初心宏經。既無神力。當依內禁。故說陀羅尼。復須外護。故說嚴王普賢。聯翩重疊。使大法宏通耳。復次普賢更請正說。勸發自行。更請流通。勸發化他。佛總以四法答之。一者為諸佛護念。二者植眾德本。三者入正定聚。四者發救一切眾生之心。卽是雙答正及流通大旨。何者。佛雖無偏。若能遠惡從善。反迷還正。開權知見。顯佛知見。則稱可聖心。諸佛護念。若佛知見開。則般若照明。是植眾德本。亦是入正定聚。不亂不味。不取不捨。亦是發救眾生心。當知此四。與開權顯實名異體同。無二無別。又佛護念者。是開佛知見。植眾德本者。是不佛知見。發救眾生心。是悟佛知見。入正定聚。是入佛知見。迹門之要。此四收矣。又迹則有本。從本開示悟入。故有迹中開示悟入。今開迹卽顯本。本迹無二無別。以四法答其請。正於義明矣。以四法答請流通者。流通之方。唯三唯四。發救眾生心。是入如來室。入正定聚。佛所護念。是著如來衣。植眾德本。是坐如來座。是宏宣之要。卽四而三也。又發救眾生心。是誓願安樂行。入正定聚。是意安樂行。植眾德本。是口安樂行。諸佛護念。是身安樂行。當知後四卽前四也。一答酬其兩請。

舉四冠罩一經。法華之重演。豈不巧且妙哉。所願一句。沾神威。資彼岸。思惟修習。永用舟航。隨喜見聞。恆爲主伴。若取若捨。經耳成緣。或順或逆。終因斯脫。願解脫之日。依報正報。常宣妙經。一利一塵。無非利物。惟願諸佛。冥熏加被。一切菩薩。密借威靈。在在未說。皆爲勸請。凡有說處。親承供養。一句一偈。增進菩提。一色一香。永無退轉。

## 跋

古今印法華者頗多。所出版本亦互有不同。惟迄未印冠科者。嘗見諸方講筵。開演是經。主講者爲便記憶。將科目批于眉。註于行。依科敷演。意甚獲體。學者爲便披尋。亦爭相傳鈔。第以科目繁冗。母子遞生。初學者。每以不諳其來脈。望經興嘆。不事分鈔。間有鈔者。錯前貽後。兼以所書字體。鉅細不一。致使經本。一片塗鴉。憾事也。吾師湛山倓虛大師。有鑒于是。於廿年前。即蘊印法華冠科之願。祇以機緣未熟。未獲滿願。丙申夏。樹幢香江。鑒于世局不靖。災禍頻仍。乃眾業所感。因發動港九四眾。成立法華經念誦法會。冀消眾業。竝資緣發起。排印法華冠科。命光攝其事。光受命後。即依民十三年。三寶經房木刻版。將滿益大師會義科。刊鈔于經眉。以爲底本。在鈔科時。本擬依照通例。將複科畧去。祇標單科。俟奉大師囑。勿嫌重複。將複科原樣保存。並加句讀。蓋爲便初學也。每卷末附以持驗記。最後附法華論贊。一爲令人起信。一爲易得要領。其假俗諸字。能通融者。易之。過于逆俗者。仍之。至版本之錯簡不同者。又參以續藏。大正藏。支贊本。敦煌本。宋本等。互爲校訂。其中某處。據某本改正。均斟酌去取。擇善而從。不遑備舉。惟有兩點。須加說明者。一、對如來

妙法蓮華經冠科跋

一

妙法蓮華經冠科跋

二

十種通號諸本。皆以善逝。世間解讀之爲一。今依大師意。另有專文解釋。將善逝世間解讀之爲一。正符十種通號之名。二、妙音菩薩本事品。無不孝父母。不敬沙門。邪見不善心。不攝五情。否一段文。諸家句讀。錯誤不一。今依會義本。並參以添品法華。定其句讀。本經之印行。有科文。有句讀。若以之充經壇誦本。或法堂教本。無須註疏。可得事半功倍之效。此次大師以所得贖施。頒囊印經。轉以法施。不數者。由諸善信助之。大師之悲願如船。願後之受持是經者。亦可同乘此船。出苦海而到彼岸矣。

佛曆二九八四年歲次丁酉仲夏天台嫡傳後學大光謹跋

## 妙法蓮華經普勸修持錄

1. 云何名諸佛世尊，唯以一大事因緣故，出現於世？諸佛世尊，欲令眾生開佛知見，使得清淨故，出現於世；欲示眾生佛之知見故，出現於世；欲令眾生悟佛知見故，出現於世；欲令眾生入佛知見道故，出現於世。是為諸佛以一大事因緣故，出現於世。
2. 舍利弗！如來但以一佛乘故，為眾生說法，無有餘乘若二若三，一切十方諸佛，法亦如是。
3. 十方佛土中，唯有一乘法，無二亦無三，除佛方便說。
4. 舍利弗當知，我本立誓願，欲令一切眾，如我等無異。（我指釋迦牟尼佛）
5. 若人散亂心，入於塔廟中，一稱南無佛，皆已成佛道。
6. 諸佛興出世，懸遠值遇難；正使出於世，說是法復難；無量無數劫，聞是法亦難；能聽是法者，斯人亦復難。（是法指法華經）
7. 若人不信，毀謗此經，則斷一切，世間佛種。
8. 佛告華王：又如來滅度之後，若有人聞妙法華經，乃至一偈一句，一念隨喜者，我亦予授阿耨多羅三藐三菩提記。
9. 若於一劫中，常懷不善心，作色而罵佛，獲無量重罪。其有讀誦持，是法華經者，須臾加惡言，其罪復過彼。
10. 藥王今告汝，我所說諸經，而於此經中，法華最第一。
11. 我所說經典，無量千萬億，已說今說當說而於其中；此法華經最為難信難解。
12. 多有人在家出家行菩薩道，若不能得見閱讀誦書持供養是法華經者，當知是人未善行菩薩道。
13. 若以大地置足甲上，升於梵天是未為難；佛滅度後於惡世中，暫讀此經是則為難。
14. 當於一切眾生，起大悲想；於諸如來，起慈父想；於諸菩薩，起大師想；於十方諸大菩薩，常應深心恭敬禮拜；於一切眾生，平等說法。
15. 文殊師利！是法華經，於無量劫中，乃至名字不可得聞，何況得見受持讀誦？
16. 文殊師利！此法華經，是諸如來第一之說，於諸說中最高甚深，末後賜予。
17. 爾時世尊欲重宣此義而說偈言：……每自作是意，以何令眾生，得入無上道，速成就佛身。
18. 如來滅後受持是經，若讀若誦若解說若書寫得千二百意功德。以是清淨意根，乃至聞一偈一句，通達無量無邊之義，解是義已能演說一句一偈，至於一月四月乃至一歲。……三千大千世界六趣眾生，心之所行、心所動作、心所戲論皆悉知之。雖未得無漏智慧，而其意根清淨如此。
19. 爾時常不輕菩薩，豈異人乎？則我身是。若我於宿世，不受持讀誦此經，為他人說者，不能疾得阿耨多羅三藐三菩提。
20. 以要言之：如來一切所有之法、如來一切自在神力、如來一切祕要之藏、如來一切甚深之事，皆於此經宣示顯說。是故，汝等於如來滅後，應一心受持、讀誦、解說、書寫，如說修行。
21. 是故有智者，聞此功德利，於我滅度後，應受持斯經，是人於佛道，決定無有疑。
22. 一切川流江河諸水之中，海為第一，此法華經亦復如是，於諸如來所說經中，最高深大。

- 23 衆山之中，須彌山為第一，此法華經亦復如是，於諸經中，最為其上。
- 24 衆星之中，月天子最為第一，此法華經亦復如是，於千萬億種諸經法中，最為照明。
- 25 諸小王中，轉輪聖王最為第一，此經亦復如是，於諸經中，最為其尊。
- 26 又如：帝釋，於三十三天中王，此經亦復如是，諸經中王。
- 27 大梵天王，一切衆生之父，此經亦復如是，一切賢、聖、學、無學及發菩薩心者之父。
- 28 此經亦復如是，一切如來所說，若菩薩所說，若聲聞所說，諸經法中，最為第一。
- 29 有能受持是經典者，亦復如是，於一切衆生中，亦為第一。
- 30 一切聲聞、辟支佛中，菩薩為第一，此經亦復如是，於一切諸經法中，最為第一。
- 31 如佛為諸法王，此經亦復如是，諸經中王。
- 32 此法華經亦復如是，能令衆生離一切苦，一切病痛，能解一切生死之縛。
- 33 若善男子、善女人，於如來滅後，云何能得是法華經？佛告普賢菩薩：若善男子、善女人，成就四法，於如來滅後，當得是法華經：一者、為諸佛護念；二者、植衆德本；三者、入正定聚；四者、發救一切衆生之心。善男子、善女人，如是成就四法，於如來滅後，必得是經。
- 34 若法華經，行闍浮提，有受持者，應作此念，皆是普賢威神之力。
- 35 普賢！若有受持、讀誦、正憶念、修習、書寫是法華經者，當知是人則見 釋迦牟尼佛，如從佛口聞此經典；當知是人供養 釋迦牟尼佛；當知是人佛讚善哉！當知是人為 釋迦牟尼佛手摩其頭；當知是人為 釋迦牟尼佛衣之所覆。（上文均錄自 法華經，文中我字皆指 釋迦世尊）

妙法蓮華經為天台宗之依據經典，因之該宗亦稱法華宗，而天台宗又緣其始祖智者大師居天台山修禪寺而得名。龍樹、慧文、慧思、智者、灌頂、智威、慧威、玄朗、湛然等九位大師世稱天台宗九祖。中國初祖慧文禪師因閱龍樹菩薩之中觀論至四諦品，偈云：「因緣所生法，我說即是空，亦名為假名，亦名中道義。」豁然開悟遂遠禮龍樹菩薩為師，故天台宗尊龍樹菩薩為初祖。後慧思大師親近慧文專頌法華經，大悟法華三昧，自後所未聞經不疑自解。集天台大成之智者大師禮慧思為師，思曰：「昔日靈山同聽法華，宿緣所追今復來矣！」並教智者修法華三昧，修二七日誦法華經至藥王品之「是真精進，是真法供養如來。」身心豁然寂而入定，見靈山一會儼然未散宿通潛發，得「無碍辯才」，後一切佛法無師自通，師將所證告思，慧思嘆曰：「非汝莫證非我莫識，所入定者法華三昧初旋陀羅尼也！縱令文字之師千萬，不能窮汝辯矣！」至金陵講法華經，單釋經題妙法蓮華經五字，連說九十天，是為有名「九旬談妙」，由章安大師筆錄成法華玄義。

妙法蓮華經、仁王護國經、金光明經稱之為三大護國經典，民國四五年湛山倭虛大師鑒于世局不靖災禍頻仍，乃衆業所感而發動港九四衆，成立法華經念誦法會，冀消衆業祈世界之和平。日本於推古天皇，遣使來華求傳此經，時值聖德太子攝政，曾講於宮中並作註疏。繼之聖武天皇詔全國尼寺，必備此經十部，稱之為法華滅罪寺，及入唐留學僧最澄返國，亦依之以創天台宗。其後日蓮上人睹國難空前，曾云：「唯一拯救之道，除採用法華經以破邪外別無良徑。」是故志求護世、護國、護民、「一佛乘」者常應勤加精進，受持、讀、誦、解說、書寫：最為深大！最為其上！最為照明！最為其尊！最為第一！諸經中王——妙法蓮華經。

文殊師利！是法華經，  
於無量劫中，乃至名字不  
可得聞，何況得見受持讀  
誦？

安樂行品

◎ 敬請常念

南無妙法蓮華經